

摘藻堂四庫全書薈要

集部

欽定四庫全書薈要卷一萬八千七百四十一

集部

御定佩文齋詠物詩選卷一百十九

樓類

五言古

登景陽樓

宋文帝

崇堂臨萬雉層樓跨九成
瑤軒籠翠幌組幕翳雲屏
階上曉露潔林下夕風清
蔓藻環綠葉芳蘭媚紫莖
極望周天險留察浹神京
交渠紛綺錯列植發華英

奉和登北顧樓

梁簡文帝

春陵佳麗地濟水鳳皇宮
况此徐方域川嶽邁周豐
皇情愛歷覽遊陟擬崆峒
聊驅式道候無勞襄野童
霧崖開早日晴天歇晚虹
去帆入雲裏遙星出海中

水中樓影

簡文帝

水底罌兒出萍間
反宇浮風生色不壞浪去影恒留
和晉安王薄晚逐涼北樓回望應教

梁庾肩吾

向夕紛喧屏追涼飛觀中樹影臨城日窗含度水風遙
天如接岸遠帆似凌空陪文慚宋玉徒等侍蘭宮

和晚日登樓

梁劉緩

所以登臺榭正重接煙霞長絲觸欄斷歸鳥避窗斜俯
巢窺暝宿臨樹摘高花百雉時方晚九層光尚賒

詠水中樓影

梁王臺卿

飄飄似雲度亭亭如蓋浮熟看波不動還是映高樓

初春登樓即目觀作述懷

唐太宗

憑軒俯蘭閣，眺矚散靈襟。
綺峰含翠霧，照日藥紅林。
鏤丹霞錦岫，殘素雪斑岑。
拂浪隄垂柳，嬌花鳥續吟。
連甍豈一拱，衆榦如千尋。
明非獨材力，終藉棟梁深。
彌懷矜樂志，更懼戒盈心。
愧制勞居逸，方規十產金。

奉和登陝州城樓應制

唐許敬宗

挹河澄綠宇，御溝映朱宮。
宸旂翻麗景，星蓋曳雕虹。
學顰齊柳嫩，妍笑發春叢。
錦鱗文碧浪，繡羽絢青空。
眷念三階靜，遐想二南風。

奉和聖製登蒲州逍遙樓應制

唐
蘇
頲

在昔堯舜禹遺塵成典謨聖皇東巡狩况乃經此都樓
觀紛迤邐河山幾縈紆緬懷祖宗業相繼文武圖尚德
既無險觀風諒有孚豈如汾水上簫鼓事遊娛

題陸山人樓

唐
儲
光
羲

暮聲雜初鴈夜色涵早秋獨見海中月照君池上樓山
雲拂高棟天漢入雲流不惜朝光滿其如千里遊

登錦城散花樓

唐李白

日照錦城頭朝光散花樓
金窗夾繡戶珠箔懸瓊鉤
飛梯綠雲中極目散我憂
暮雨向三峽春江繞雙流
今來一登望如上九天遊

遊平泉宴浥澗宿香山石樓贈坐客

唐白居易

逸少集蘭亭季倫宴金谷
金谷太繁華蘭亭開絲竹
何如今日會浥澗平泉曲
杯酒與管絃貧中隨分足
紫鮮

林筍嫩紅潤園桃熟採摘助盤筵芳滋盈口腹閒吟暮
雲碧醉藉春草綠舞妙艷流風歌清叩寒玉古詩惜晝
短勸我令秉燭是夜勿言歸相攜石樓宿

登谿山第一樓有懷倪元鎮

明陳汝言

清晨獨倚樓秋色淨如洗山青雲弄姿江白風初起心
隨沙鳥閒目送征帆駛對景每懷人相看隔千里

七言古

山陰縣西樓

唐孫逖

都邑西樓芳樹間
逶迤霽色遶江山
海月夜從公署出
江雲晚對訟庭還
誰知春色朝朝好
二月飛花滿江草
一見湖邊楊柳風
遙憶青青洛陽道

郢城西樓吟

唐
郎士元

連山盡處水縈迴
山上戍門臨水開
朱欄直下一百丈
日暖游鱗自相向
昔人愛險閉層城
今人愛閒江復清
沙洲楓岸無來客
草綠花紅山鳥鳴

寓居合江樓

宋
蘇軾

海上葱龍氣佳哉二江合處朱樓開蓬萊方丈應不遠
肯爲蘇子浮江來江風初涼睡正美樓上啼鴉呼我起
我今身世兩相違西流白日東流水樓中老人日清新
天上豈有癡仙人三山咫尺不歸去一杯付與羅浮春

黃氏容安樓

元郭鉅

君家高樓高百尺樓間把酒無虛日極目欲窮千里心
誰謂區區僅容膝捲簾半空雲氣入孤鶴長鳴楚天碧
醉拍闌干呼月來萬壑松風夜吹笛天上玉京十二樓

羣仙不帶人間愁
曉飛霞珮來相訪
攜我共作丹丘遊
今日之日君我留
爲君題詩樓上頭
笑指樓前大江流
古今人物共風流

城南樓

元僧惟則

城南樹尾花風晴
城南樹下漁舟行
隔谿竹屋數家酒
矮籬路轉人縱橫
仙山石洞在眼底
塔竿倒影滄波明
相期待渡日已晚
坐看平野青煙生

五言律

奉和御製登駕鵞樓即目應制

唐孫逖

玉輦下離宮
瓊樓上半空
方巡五年狩
更闢四門聰
井邑觀秦野
山河念禹功
停鑿畱睿作
軒檻起南風

登河北城樓作

唐王維

井邑傳巖上
客亭雲霧間
高城眺落日
極浦映蒼山
岸火孤舟宿
漁家夕鳥還
寂寥天地暮
心與廣川閒

與杭州薛司戶登樟亭樓作

唐孟浩然

水樓一登眺半出青林高
帝幕英寮敞芳筵下客叨
山藏伯禹穴城壓伍胥濤
今日觀溟漲垂綸欲釣鰲

題金城臨河驛樓

唐岑參

古戍依重險高樓見五涼
山根盤驛道河水浸城牆
庭樹巢鸚鵡園花隱麝香
忽如江浦上憶作捕魚郎

秋登宣城謝朓北樓

唐李白

江城如畫裏山曉望晴空
兩水夾明鏡雙橋落彩虹
人煙寒橘柚秋色老梧桐
誰念北樓上臨風懷謝公

與夏十二登岳陽樓

李白

樓觀岳陽盡川向洞庭開
鴈引愁心去山銜好月來
雲間連下榻天上接行杯
醉後涼風起吹人舞袖迴

登兗州城樓

唐杜甫

東郡趨庭日南樓縱目初
浮雲連海岱平野入青徐
孤嶂秦碑在荒城魯殿餘
從來多古意臨眺獨躊躇

題新津北橋樓得郊字

杜甫

望極春城上開筵近鳥巢
白花簷外朶青柳檻前梢
池

水觀爲政廚煙覺遠庖西川供客眼惟有此江郊

白帝城樓

杜甫

江度寒山閣城高絕塞樓翠屏宜晚對白谷會深遊
急能鳴鴈輕輕不下鷗夷陵春色起漸擬放扁舟

和樊潤州秋日登城樓

唐皇甫冉

露冕臨平楚寒城帶早霜時同借河內人是卧淮陽
積水澄天塹連山入帝鄉因高欲見下非是愛秋光

奉陪渾侍中五日登白鶴樓

唐盧綸

高樓倚玉梯朱檻與雲齊
顧盼臨霄漢談諧息鼓鼙
洪河迴更直野雨急仍低
今日陪樽俎還應醉似泥

奉陪段相公晚夏登張儀樓

姚向

秦相架羣材登臨契上台
查從銀漢落江自雪山來
儷曲親流火凌風洽小杯
帝鄉如在目欲下盡徘徊

晚夏登張儀樓

唐姚康

登覽值晴開詩從野思來
蜀川新草木秦日舊樓臺
池影搖中座山光接上台
近秋宜晚景極目斷浮埃

同薛侍御登黎陽縣樓眺黃河

唐
楊巨源

倚檻恣流目高城臨大川
九回紆白浪一半在青天氣
肅晴空外光翻曉日邊
開襟值佳景懷抱更悠然

江樓偶宴贈同座

唐
白居易

南浦閒行罷西樓小宴時
望湖凭檻久待月放杯遲
江果嘗盧橘山歌聽竹枝
相逢且同樂何必舊相知

嘉州驛樓晚望

唐
姚鵠

樓壓寒江上，開簾對翠微。
斜陽諸嶺暮，古渡一僧歸。
窗迴雲衝起，汀遙鳥背飛。
誰言坐多倦，目極自忘機。

長沙陪裴大夫登北樓

唐李羣玉

巖嶂隨高步，琴樽奉勝遊。
金風吹綠簟，湖水入朱樓。
朗抱雲開月，高情鶴見秋。
登臨多暇日，非爲賦消憂。

題樟亭驛樓

唐喻坦之

危檻倚山城，風帆檻外行。
日生滄海赤，潮落浙江清。
秋晚遙峰出，沙乾細草平。
西陵煙樹色，長見伍員情。

和于興宗守綿州登越王樓以詩寄朝士

唐王鐸

謝朓題詩處危樓壓郡城
雨餘江水碧雲斷雪山明
錦繡來仙境風光入帝京
恨無青玉案何以報高情

岳陽樓

唐江為

倚樓高望極展轉念前途
晚葉紅殘楚秋江碧入吳
雲中來鴈急天末去帆孤
明月誰同我悠悠上帝都

彭城南樓

宋文同

百尺壓城端飛簷欲上搏湖光搖埤垵山影轉闌干秀
野含春煦喬林擁暮寒回頭大岷雪千仞玉巘岼

夏曼卿作新樓扁曰瀟湘片景

宋
戴
昺

有此一樓足悠然萬慮忘拓開風月地壓斷水雲鄉四
野畱春色千峰照夕陽眼前無限景何處認瀟湘

建昌胡氏小有樓

元
陳
旅

窈窕麻姑宅登臨憶謝公近聞好山色多在小樓中屋

曙丹霞吐城深翠雨通石池正當戶人立藕花風

漢江城樓

明 李言恭

樓閣依山出城高逼太空帆檣入煙霧波浪過簾櫳燈
火深林裏星河流水中人家半漁者蓑笠挂秋風

夕佳樓

明 姚旅

託意眺西嶺嵐陰過水濃煙能添晚翠霞亦勝朝容客
散樓頭月人間野水鐘於茲遠塵侶倦鳥每相從

五言排律

登瀛洲南樓寄遠

唐 沈佺期

層城起麗譙，憑覽出重霄。
茲地多形勝，中天宛寂寥。
四榮摩鵲鶴，百拱厲風飈。
北際燕王館，東連秦帝橋。
晴光七郡滿，春色兩河遙。
傲睨非吾土，躊躇適遠囂。
離居欲有贈，春草寄長謠。

登臨沮樓

唐 張九齡

高深不可厭，巡屬復來過。
本與衆山絕，况韶景和危。
樓入水，倒飛檻向空。
摩羅樹，緣青壁，膠枝挂綠蘿。
潭清

能徹底魚樂好跳波有象言難具無端思轉多同懷不
在此孤賞欲如何

新成甲仗樓

唐
張籍

謝氏起新樓西臨城角頭圖功百尺麗藏器五兵修結
締棖薨固虛明戶檻周魚龍卷旗幟霜雪積戈矛暑雨
燄蒸隔涼風宴位留地高形出沒山靜氣清幽睥睨斜
光徹欄干宿靄浮芊芊秔稻色脈脈宛谿流郡化王丞
相詩情沈隱侯居茲良得意殊勝峴山遊

分題蕃宣樓送山僉憲之閩

元 吳師道

大府開閩土危樓鎮海涯
飛雲浮畫棟麗日照高牙
昔駐蕃侯馬今迎使者車
三山歸指顧萬井仰光華
縹緲臨城處逍遙散吏衙
榕陰千樹翠荔子半空霞
嶺嶠俱清謐賓僚亦靜嘉
宣風問民俗作屏扞王家
去去青冥越依依紫禁花
登高應有賦留待碧籠紗

七言律

登安陽城樓

唐 孟浩然

縣城南面漢江流江嶂開成南雍州才子乘春來騁望
羣公暇日坐銷憂樓臺晚映青山郭羅綺晴嬌綠水洲
向夕波搖明月動更疑神女弄珠遊

七月一日題終明府水樓

唐杜甫

高棟層軒已自涼秋風此日灑衣裳
條然欲下陰山雪
不去非無漢署香
絕壁過雲開錦繡
疎松隔水奏笙簧
看君宜著王喬履
真賜還疑出尚方

江陵節度使陽城郡王新樓成王請嚴侍御判

官賦七字句同作

杜甫

樓上炎天冰雪生
高飛燕雀賀新成
碧窗宿霧濛濛濕
朱戟浮雲細細輕
仗鉞塞帷瞻具美
投壺散帙有餘清
自公多暇延叅佐
江漢風流萬古情

又作此奉衛王

杜甫

西北樓成雄楚都
遠開山嶽散江湖
二儀清濁還高下
三伏炎蒸定有無
推轂幾年惟靜鎮
曳裾終日盛文儒
白頭授簡焉能賦
媿似相如爲大夫

五鳳樓晚望

唐白居易

晴陽晚照濕煙銷
五鳳樓高天沈寥
野綠全經朝雨洗
林紅半被暮雲燒
龍門翠黛眉相對
伊水黃金線一條
自入秋來風景好
就中最好是今朝

庾樓曉望

白居易

獨憑朱檻立凌晨
山色初明水色新
竹霧曉籠銜嶺月
蘋風暖送過江春
子城陰處猶殘雪
衙鼓聲前未有塵
三百年來庾樓上
曾經多少望鄉人

題岳陽樓

白居易

岳陽城下水漫漫，獨上危樓凭曲欄。
春岸綠時連夢澤，夕波紅處近長安。
猿攀樹立啼何苦，鴈點湖飛渡亦難。
此地惟堪畫圖障，華堂張與貴人看。

過襄陽樓呈上府主嚴司空樓在江陵節度使

宅北隅

唐元稹

襄陽樓下樹陰成，荷葉如錢水面平。
拂水柳花千萬點，隔林鶯舌兩三聲。
有時水畔看雲立，每日樓前信馬行。

早晚暫教王粲上庾公應待月華明

春早郡樓書事寄呈府中羣公

唐
許渾

兩鬢垂絲髮半霜石城孤夢繞襄陽
鴛鴻幕裏蓮披檻
虎豹營中柳拂牆
畫舸欲行春水急
翠簾初捲暮山長
峴亭風起花千片
流入南湖盡日香

和剡縣陳明府登縣樓

唐
方干

郭裏人家如掌上
簷前樹木映窗櫺
煙霞自接天台地

分野應侵婺女星
驛路古今通
北闕仙谿日夜入
東溟
綵衣才子多吟嘯
公退時時見畫屏

尚書新創敵樓

方干

異境永爲歡樂地
歌鐘夜夜復年年
平明旭日生牀底
薄暮殘霞落酒邊
雖向檻前窺下界
不知窗裏是中天
直須分付丹青手
畫出旌幢遶謫仙

太保中書令軍前新樓

唐吳融

十二闌干壓錦城
半空人語落灘聲
風流近接平津閣

氣色高含細柳營盡日捲簾江草綠有時欹枕雪峰晴
不知奉詔朝天後誰此登臨看月明

秋日登臨越王樓

唐李渥

越王曾牧劔南州因向城隅建此樓橫玉遠開千嶠雪
暗雷下聽一江流畫簷先弄朝陽色朱檻低臨衆木秋
徒學仲宣聊四望且將詩賦好依劉

煙雨樓

宋鄭俠

仙人居處即鰲宮更作層樓峭倚空羣岫西來煙漠漠

大江南去雨濛濛
花鑣柳策熙怡裏
耘笠漁簑笑語中
別有夜楹千里月
憑闌清興與誰同

望海樓

宋 米芾

雲間鐵甕近青天
縹緲飛樓百尺連
三峽江聲流筆底
六朝帆影落樽前
幾番畫角催紅日
無事滄洲起白煙
忽憶賞心何處是
春風秋月兩茫然

望湖樓晚眺

宋 楊時

斜日侵簾上玉鉤
簷花飛動錦文浮
湖光寫出千峰秀

天影融成十里秋
翠鵲翻飛窺淺水
片雲隨意入滄洲
留連更待東窗月
注目晴空獨倚樓

鄂州南樓

宋 范成大

誰將玉笛弄中秋
黃鶴飛來識舊遊
漢樹有情橫北渚
蜀江無語抱南樓
燭天燈火三更市
搖月旌旗萬里舟
却笑鱸江垂釣手
武昌魚好便淹留

晚登木瀆小樓

范成大

萬象當樓黼繡張
欄干一曲立蒼茫
雲堆不動山深碧

星出無多月淡黃宿鳥盡時猶數點歸鴻驚處更斜行
松陵正有鱸魚上安得長竿坐釣航

宴西樓

宋陸游

西樓遺迹尚豪雄錦繡笙簫在半空萬里因循成久客
一年容易又秋風燭光低映珠簾麗酒暈徐添玉頰紅
歸路迎涼更堪愛摩訶池上月方中

黃鶴樓

宋游侶

長江巨浪拍天浮城郭相望萬景收漢水北吞雲夢入

蜀江西帶洞庭流角聲交送千家月帆影中分兩岸秋
黃鶴樓高人不見却隨鸚鵡過汀洲

陳待制湖樓

宋 趙師秀

何處飛來縹緲中人間惟有畫圖同兩層簾幕垂無地
一片笙簫起半空巖竹倒添秋水碧渚蓮平接夕陽紅
遊人未達蒙莊旨虛倚闌干面面通

王元仲海岳樓同諸公賦

金 王 壽

十二朱闌倚半空元龍高卧定誰雄簷楹翠濕蓬山雨

枕簟涼生弱水風物色橫陳詩卷裏雲濤飛動酒杯中
謫仙會有騎鯨便八極神遊路可通

煙雨樓

明 葛一龍

煙雨樓頭春乍晴鴛鴦湖上鳥嚶嚶中浮片席空三面
斜抱千家截半城漁網曬來風柳變酒船搖出浪花生
夕陽慣照憑闌客一抹遙山鏡裏明

七言排律

重題別東樓

唐 白居易

東樓勝事我偏知，氣象多隨昏旦移。
湖捲衣裳白重疊，山張屏障綠參差。
海仙樓閣晴方出，江女笙簫夜始吹。
春雨星攢尋蟹火，秋風霞飈弄濤旗。
宴宜雲髻新梳後，曲愛霓裳未拍時。
太守三年嘲不盡，郡齋空作百篇詩。

五言絕句

登鸛雀樓

唐 王之渙

白日依山盡，黃河入海流。
欲窮千里目，更上一層樓。

登樓

唐 韋應物

茲樓日登眺流歲暗蹉跎坐厭淮南守秋山紅樹多

登鶴雀樓

唐暢當

迴臨飛鳥上高出人世間天勢迴平野河流入斷山

北樓

唐韓愈

郡樓乘曉上盡日不能回晚色將秋至長風送月來

江樓

唐杜牧

獨酌芳春酒登樓已半醺誰驚一行鴈衝斷過江雲

高樓

唐于鄴

遠天明月出照此誰家樓上有羅衣色涼風吹不秋

七言絕句

芙蓉樓送辛漸

唐王昌齡

丹陽城南秋海陰丹陽城北楚雲深
高樓送客不能醉寂寂寒江明月心

黃鶴樓送孟浩然之廣陵

唐李白

故人西辭黃鶴樓煙花三月下揚州
孤帆遠影碧空盡惟見長江天際流

寄王舍人竹樓

唐李嘉祐

傲吏身閒笑五侯
西江取竹起高樓
南風不用蒲葵扇
紗帽閒眠對水鷗

登清暉樓

唐劉禹錫

潯陽江色添潮滿
彭蠡秋聲送鴈來
南望廬山千萬仞
共誇新出棟梁材

宅西有流水牆下構小樓
臨翫之時頗有幽趣
因命歌酒聊以自娛
獨醉獨吟偶題五首

錄一

唐
白居易

水色波文何所似，麴塵羅帶一條斜。
莫言羅帶春無主，自置樓來屬白家。

竹樓宿

白居易

小書樓下千竿竹，深火爐前一盞燈。
此處與誰相伴宿，燒丹道士坐禪僧。

登澧州驛樓寄京兆韋尹

唐
杜牧

一話汾陽舊使君，郡人回首望青雲。
政聲長與江聲在，

自到津樓日夜聞

望海樓晚景

宋蘇軾

海上濤頭一綫來
樓前指顧雪成堆
從今潮上君須上
更看銀山二十回

其二

青山斷處塔層層
隔岸人家喚欲應
江上秋風晚來急
爲傳鐘鼓到西興

鄂州南樓

宋黃庭堅

四顧山光接水光
凭闌十里芰荷香
清風明月無人管
併作南來一味涼

雨中登岳陽樓望君山

黃庭堅

滿川風雨獨凭闌
綰結湘娥十二鬟
可惜不當湖水面
銀山堆裏看青山

雙城寺中登樓

金周昂

雲意生陰晚不收
西風疎雨一江秋
畫圖忽上闌干角
隱隱平灣轉釣舟

友雲樓

金白賁

霧縈煙迷十二闌
壺觴招我一躋攀
黃簾捲起湘川竹
分得西州數點山

東樓雨中

金王元粹

水邊人靜燕爭泥
風動綠荷香滿谿
高樹繞樓遮望眼
獨看山色過牆西

其二

雨入谿樓不見山
雨晴依舊數峰間
韋郎詩句王維畫

好在幽人指顧間

雨過登樓

元
劉秉忠

錦里春光曉望中雨餘花潤草蒙茸
青山尚在浮雲裏樓上分明見幾峰

湖光山色樓口占

元
顧瑛

天風吹雨過湖去谿水流雲出樹間
樓上幽人不知暑鈎簾把酒看虞山

其二


晴山遠樹青如薺
野水新秧綠似苔
落日湖光三萬頃
盡隨飛鳥帶將迴

樓居春曉望元圃

元張雨

子晉新宮倚太霞
繞湖煙火萬人家
觀臺一面無人處
日出煙消都是花

御定佩文齋詠物詩選卷一百十九



總校官庶吉士臣侍朝

校對官檢討臣蕭九成
謄錄監生臣王元勳

欽定四庫全書薈要

集部

御定詠物詩選卷一百

二十至
二十三

詳校官原任主事_臣李斯咏

欽定四庫全書薈要卷一萬八千七百四十二

集部

御定佩文齋詠物詩選卷一百二十

閣類

五言古

登州中新閣

北周

庾信

跨虛凌倒景連雲距少陽璇極龍鱗上雕甍鵬翅張千
尋文杏照十里木蘭香開窓對高掌平坐望河梁歌響
聞長樂鐘聲徹建章賦用王延壽書須韋仲將龍來隨

畫壁鳳起逐吹簞石作芙蓉影池如明鏡光花梁反披
葉蓮井倒垂房徒然思燕賀無以預鵲翔

水閣朝霽奉簡雲安嚴明府

唐杜甫

東城抱春岑江閣鄰石面崔嵬晨雲白朝旭射芳甸雨
檻卧花叢風牀展書卷鈎簾宿鷺起丸藥流鶯囀呼婢
取酒壺續兒誦文選晚交嚴明府矧此數相見

登閣

宋陳與義

今日天氣佳登臨散腰脚南方宜草木九月未黃落秋

郊乃明麗夕雲更蕭索遠遊吾未能歲暮依樓閣

豁然閣

宋程俱

雲霞墮西山飛帆拂天鏡誰開一窓明納此千頃淨寒
蟾發澹白一雨破孤迴時邀竹林交或盡剡谿興扁舟
還北城隱隱聞鐘磬

五言律

宿香山閣

唐賀朝

暝望春山閣梯雲宿半空軒窓閉潮海枕席拂煙虹朱

網防棲鷁紗燈護夕蟲一聞雞唱曉已見日曈曈

夜宿西閣曉呈元二十一曹長

唐杜甫

城暗更籌急樓高雨雪微稍通綃幕霽遠帶玉繩稀
門鵲晨光起橋烏宿處飛寒江流甚細有意待人歸

西閣雨望

杜甫

樓雨霑雲幔山寒著水城逕添沙面出湍減石稜
生菊蕊淒疎放松林駐遠情滂沱朱檻濕萬慮倚檐楹

宿竹閣

唐白居易

晚坐松檐下宵眠竹閣間清虛當服藥幽獨抵歸山巧
未能勝拙忙應不及閒無勞別修道即此是元關

滕王閣

唐張喬

昔人登覽處遺閣大江隅疊浪有時有閒雲無日無早
涼先燕去返照後帆孤未得營歸計菱歌滿舊湖

登閣

宋朱子

橫空敞新閣高處絕炎氛野迴長風入天秋涼氣分憑

蘭生逸想投迹遠人羣終憶茅檐外空山多白雲

艤舟登滕王閣

宋戴復古

散步登城郭維舟古樹傍澄江浮野色虛閣貯秋光却
酒淋衣濕搓橙滿袖香西風吹素髮猶逐少年狂

光霽閣晚望

宋真山民

一閣納萬象危闌俯渺茫白沙難認月黃葉易爲霜宿
鳥投煙嶼歸樵趁野航孤吟誰是伴漁笛起滄浪

翁邨翠流閣

元尹廷高

四圍山翠合縹緲見危樓地狹星辰少雲深水石幽谿
聲晴亦雨松影夏如秋爲語遊方者桃源豈外求

菌閣

元張雨

巖架菌芝閣榜題松雪扉雲來畫檐宿龍向墨池歸對
几琴三疊憑闌山四圍仙靈能夜降應得授玄機

登天柱閣

明胡纘宗

與客上江樓橫江山欲浮雲當天柱出月傍小姑流帆
外收吳楚尊前落斗牛瀾漫忽千里倚檻思悠悠

五言排律

奉和聖製登朝元閣

唐錢起

六合紆元覽重軒啟上清石林飛棟出霞頂泰階平拂
曙鑾輿上睇陽瑞雪晴翠微回日馭丹巘駐天行御氣
升銀漢垂衣俯錦城山通玉苑迴河抱紫闕明感物乾
文動凝神道化成周王陟喬嶽列辟讓英聲

望凌煙閣

唐劉公興

畫閣凌虛構遙瞻在九天丹楹崇壯麗素壁會勲賢靄

靄浮元氣亭亭出瑞煙近看分百辟遠揖誤羣仙圖列
青霄外儀形紫禁前望中空霽景驤首幾留連

登福昌山閣

宋 蔡 襄

危磴通高閣登臨境迴清雲開千岫出雪霽一川明斷
鴈來孤影遙泉落細聲野煙依竹見谿樹與橋平已助
騷人思徒搖遠客情扁舟如可泛歷歷是江程

七言律

登昇元閣

唐 李建勲

登高始覺太虛寬白雪須知唱和難雲度瑣窓金榜濕
月移珠箔水精寒九天星象簾前見六代城池直下觀
惟有上層人未到金烏飛過拂闌干

次韻孔憲蓬萊閣

宋趙抃

山顛危構傍蓬萊水閣風長此快哉天地涵容百川入
晨昏浮動兩潮來遙思坐上遊觀遠愈覺胷中度量開
憶我去年曾望海杭州東向亦樓臺

運判南園瞻民閣

宋文同

青都高與紫霄通，獨凭危欄望不窮。
萬嶺過雲秋色裏，一峰擎雪夕陽中。
檐楹曉落天邊月，窓戶晴吹石闕風。
民吏安閒財賦足，管絃時復在層空。

題晉原舒太博清谿閣

文同

危閣飛空羽翼開，下蟠波面影徘徊。
光搖畫板月深淺，聲遶曲闌風往來。
暝色四郊煙莽蒼，曉雲千嶂雪崔嵬。
主人好客民無訟，日夕登遊對酒杯。

宿延平雙谿閣

宋蔡襄

鳴籟蕭森萬木聲
濃嵐環合亂峰青
樓臺矗處雙谿會
雷電交時一劍靈
曉市人煙披霽旭
夜潭漁火鬪寒星
畫屏曾指孤舟看
今日孤舟是畫屏

登快閣黃明府強使和山谷先生畱題之韻

宋戴復古

未登快閣心先快
紅日半檐秋雨晴
宇宙無邊萬山立
雲煙不動八窓明
飛來一鶴天相近
過盡千帆江自橫
借問金華老仙伯
幾人無忝入詩盟

登淨江寺松風閣

元尹廷高

歸然傑閣倚松岡縱使無風也自涼四面闌干金碧界
萬家城郭水雲鄉清江疊嶂迷空闊白鳥蒼煙墮渺茫
風景不殊君記否吳山頂上看錢塘

題周南翁悠然閣

元杜本

大江之東彭蠡南周家高閣與雲參秋風猿狖嘯青嶂
暮雨蛟龍起碧潭遶屋千叢生杞菊過檐百尺長梗楠
何時共此登臨樂指點山川與縱談

許茂勲烏桕閣

明 葛一龍

地幽霜肅氣珊珊小閣高臨樹樹斑東顧不遮寒水渡
西來俱是夕陽山連雲送客當秋杪片月爭題落酒間
撤去四窓留半榻儘教棲鶻看人間

五言絕句

晚登郡閣

唐 韋應物

悵然高閣望已掩東城關春風偏送柳夜景欲沈山

滕王閣春日晚望

唐 曹 松

凌春帝子閣偶眺日移西浪勢平花塢帆陰上柳堤

西閣

宋朱子

借此雲窓眠靜夜心獨苦安得枕下泉去作人間雨

七言絕句

焦崖閣

唐韋莊

李白曾歌蜀道難長聞白日上青天今朝夜過焦崖閣
始信星河在馬前

澄邁驛通潮閣

宋蘇軾

倦客愁聞歸路遙
眼明飛閣俯長橋
貪看白鷺橫秋浦
不覺青林沒晚潮

巾子山翠微閣

宋戴復古

雙峰直上與天參
僧共白雲棲一菴
今古詩人吟不盡
好山無數在江南

丹青閣

宋徐璣

翠靄空霏忽有無
筆端誰著此工夫
谿山本被人圖畫
却道谿山是畫圖

天香閣

元韓性

闌干曲曲亂雲封
回首爐峰翠幾重
上界罡風秋萬頃
銀河開徧碧芙蓉

舟夜憶郡齋眺閣

明顧大典

舟移澤國暮煙長
望入蒼波思渺茫
遙憶郡齋清絕處
萬山孤閣夜焚香

御定佩文齋詠物詩選卷一百二十

欽定四庫全書薈要卷一萬八千七百四十三

集部

御定佩文齋詠物詩選卷一百二十一

莊類

附山房

五言古

宿來公山房待丁大不至

唐孟浩然

夕陽度西嶺，羣壑倏已暝。
松月生夜涼，風泉滿清聽。
樵人歸欲盡，煙鳥栖初定。
之子期宿來，孤琴候蘿逕。

遊城南韓氏莊

唐孟郊

初疑瀟湘水鑲在朱門中時見水底月動搖池上風清
氣潤竹木白光連虛空浪簇霄漢羽岸芳金碧叢何言
數畝間環泛路不窮願逐神仙侶飄然汗漫通

宿王耕雲山莊期衍師不至就題竹上

明張適

山館絕塵交惟容謝公屐洗酌松下泉題詩澗邊石吟
僧期不來掩琴坐岑寂貌此林外影雨餘正凝碧

五言律

春晚山莊率題

唐 盧照鄰

田家無四鄰，獨坐一園春。
鶯啼非選樹，魚戲不驚綸。
山水彈琴盡，風花酌酒頻。
年華已可樂，高興復留人。

藍田山莊

唐 宋之問

宦遊非吏隱，心事好幽偏。
考室先依地，爲農且用天。
輞川朝伐木，藍水暮澆田。
獨與秦山老，相歡春酒前。

侍宴長寧公主東莊應制

唐 李嶠

別業臨青甸，鳴鸞降紫霄。
長筵鸞鷟集，仙管鳳凰調。
樹

接南山近煙含北渚遙承恩咸已醉戀賞未還鑣

春日山莊

唐韋述

初歲開韶月田家喜載陽晚晴搖水態遲景蕩山光浦
淨漁舟遠花飛樵路香自然成野趣都使俗情忘

題李十四莊兼贈綦母校書

唐孟浩然

聞君息陰地東郭柳林間左右瀍澗水門庭緱氏山抱
琴來取醉垂釣坐乘閒歸客莫相待尋源殊未還

過故人莊

孟浩然

故人具雞黍邀我至田家綠樹邨邊合青山郭外斜開
筵面場圃把酒話桑麻待到重陽日還來就菊花

漢上題韋氏莊

唐岑參

結茅聞楚客卜築漢江邊日落數歸鳥夜深聞叩舷水
痕侵岸柳山翠借厨煙調笑提筐婦春來蠶幾眠

夜宴左氏莊

唐杜甫

風林纖月落衣露淨琴張暗水流花徑春星帶草堂檢
書燒燭短看劍引杯長詩罷聞吳詠扁舟意不忘

王侍御南原莊

唐賈島

買得足雲地新栽藥數窠
峰頭盤一逕原下注雙河
春寺閒眠久晴臺獨上多
南齋宿雨後仍許重來過

題朱郎中白都莊

宋王安石

瀟灑桐廬守滄江寄一廬
山光隔釣岸江氣雜炊煙
藜杖聽鳴櫓籃輿看種田
清時須共理此興在他年

趙氏南莊

元許衡

曉起北窓涼清談戢羽觴
入簾花氣重落地燕泥香
夢

裏青山小吟邊白日長
秋風載書籍相對築茅堂

宿因勝莊

元薩都拉

竹院亦幽雅參禪媿未能
夢回僧枕雨花落龕燈風
響過牆竹窻搖挂樹藤裁
詩題素壁聊爾記吾曾

山莊即事

元葉顥

策杖步松關銜杯看遠山
青鞵陪月去翠袖褰雲還
芳草斜陽外落花流水間
山林多樂意無夢到塵寰

山莊

元金涓

青邨谿盡處林密隱孤莊石老莓苔路門深薜荔牆人
行秋葉滑鶴立晚松涼治畝農歸後蓑衣挂夕陽

過故人莊

明 樊 阜

山邨行處好偶過故人莊秋竹煙籠色寒花露浥香一
雞鳴矮屋雙鷺浴橫塘留飲忘歸去陶然入醉鄉

五言排律

奉和幸韋嗣立山莊侍宴應制

唐 宋之問

樞掖調梅暇林園藝藎初入朝榮劒履退食偶琴書地
隱東巖室天迴北斗車旌門臨竄窳輦道屬扶疎雲罕
明丹壑霜笳徹紫虛水疑投石處谿似釣璜餘帝澤頒
卮酒人歡頌里閭一承黃竹詠長奉白雲居

奉和幸韋嗣立山莊侍宴應制

唐李嶠

南洛師臣契東巖王佐居幽情遺紱冕宸眷屬樵漁制
下峒山蹕思迴灞水輿松門駐旌蓋薜幄引簪裾石磴

平黃陸煙樓半紫虛雲霞仙路近琴酒俗塵疎喬木千
齡外懸泉百尺餘崖深經鍊藥穴古舊藏書樹宿搏風
鳥池潛縱壑魚寧知天子貴尚憶武侯廬

奉和幸韋嗣立山莊侍宴應制

唐

趙彥昭

賢族惟題里儒門但署鄉何如表巖洞宸翰發輝光地
在茲山曲家鄰郤水陽六龍駐旌罕四牡耀旂常北斗
臨台座東山入廟堂天高羽翼近主聖股肱良野竹池

亭氣邨花澗谷香縱然懷豹隱空媿躡鶴行

奉和幸韋嗣立山莊侍宴應制

唐武平一

三光迴斗極萬騎肅鈎陳地若遊汾水畋疑歷渭濱圓
塘冰寫鏡遙樹露成春絃奏魚聽曲機忘鳥狎人築巖
思感夢礚石想垂綸落景搖紅壁層陰結翠筠素風紛
可尚元澤藹無垠薄暮清笳動天文煥紫宸

奉和聖製幸玉真公主山莊因題石壁十韻之

作應制

唐王維

碧落風煙外，瑤臺道路賒。
如何連帝苑，別自有仙家。
此地迴鑾駕，緣谿轉翠華。
洞中開日月，窓裏發雲霞。
庭養冲天鶴，谿流上漢槎。
種田生白玉，泥竈化丹砂。
谷靜泉逾響，山深日易斜。
御羹和石髓，香飯進胡麻。
大道今無外，長生詎有涯。
還瞻九霄上，來往五雲車。

七言律

奉和初春幸太平公主南莊應制

唐李嶠

主家山第接雲開
天子春遊動地來
羽騎參差花外轉
霓旌搖曳日邊迴
還將石溜調琴曲
更取峰霞入酒杯
鸞輅已辭烏鵲渚
簫聲猶繞鳳凰臺

奉和初春幸太平公主南莊應制

唐沈佺期

主家山第早春歸
御輦春遊繞翠微
買地鋪金曾作埒
尋河取石舊支機
雲間樹色千重滿
竹裏泉聲百道飛

自有神仙鳴鳳曲併將歌舞報恩暉

侍宴安樂公主山莊應制

唐李適

平陽金榜鳳凰樓沁水銀河鸚鵡洲綵仗遙臨丹壑裏
仙輿暫幸綠亭幽前池錦石蓮花艷後嶺香爐桂蕊秋
貴主稱觴萬年壽還輕漢武濟汾遊

奉和幸安樂公主山莊應制

唐趙彥昭

六龍齊軫御朝曦雙鷁維舟下綠池飛觀仰看雲外聳
浮橋直見海中移靈泉巧鑿天孫渚孝筭能抽帝女枝

幸願一生同草樹年年歲歲樂於斯

奉和幸安樂公主山莊應制

唐韋元旦

銀河南渚帝城隅帝輦平明出九衢
刻鳳蟠螭凌桂邸穿池疊石寫蓬壺
簫暫下鈞天樂綺綴常懸明月珠
仙榜承恩歌既醉方知朝野更歡娛

奉和初春幸太平公主南莊應制

唐蘇頲

主第山門起灞川宸遊風景入初年
鳳凰樓下交天仗

金
夕
日
人
之
二
卷一百二十一
烏鵲橋頭敞御筵
往往花間逢綵石
時時竹裏見紅泉
今朝扈蹕平陽館
不羨乘槎雲漢邊

侍宴安樂公主山莊應制

蘇頌題

駸駸羽騎歷城池
帝女樓臺向晚披
露灑旌旗雲外出
風迴巖岫雨中移
當軒半落天河水
遶逕全低月樹枝
簫鼓宸遊陪宴日
和鳴雙鳳喜來儀

奉和初春幸太平公主南莊應制

唐李邕

傳聞銀漢支機石復見金輿出紫微
織女橋邊烏鵲起
仙人樓上鳳凰飛
流風入座飄歌扇
瀑水侵階澣舞衣
今日還同犯牛斗
乘槎共泛海潮歸

題平泉薛家雪堆莊

唐白居易

怪石千年應自結
靈泉一帶是誰開
蹙爲宛轉青蛇項
噴作玲瓏白雪堆
赤日暑天長看雨
玄陰臘月亦聞雷
所嗟地去都門遠
不得肩輿每日來

奉和思黯自題南莊見示兼呈夢得

白居易

謝家別墅最新奇
山展屏風花夾籬
曉月漸沈橋脚底
晨光初照屋梁時
臺頭有酒鶯呼客
水面無塵風洗池
除却吟詩兩閒客
此中情狀更誰知

題馬太尉華山莊

唐劉滄

別開池館背山陰
近得幽奇物外心
竹色拂雲連嶽寺
泉聲帶雨出谿林
一庭楊柳春光暖
三徑松蘿晚翠深
自是功成閒劍履
西齋長卧對瑤琴

題姑蘇凌處士莊

唐韋莊

一簇林亭返照間，門當官道不曾關。
花深遠岸黃鶯鬧，雨急春塘白鷺閒。
載酒客尋吳苑寺，倚樓僧看洞庭山。
怪來話得仙中事，新有人從物外還。

新買疊石谿莊招景仁

宋司馬光

一谿清水珮聲寒，兩岸莓苔錦繡斑。
三徑誰來卜鄰舍，千峰我已作家山。
鹿裘藜杖偏宜老，紫陌紅塵不稱閒。
早挈琴書遠相就，放朝爛醉白雲間。

過徐氏莊居

宋 沈與求

只著高冠不著纓，掉頭防我問功名。
數椽茅屋有時漏，一壠野田無具耕。
酒地定能容勝踐，墨畦終擬過平生。
叩舷歸去蒹葭鬧，後夜相思看月明。

漁莊

元 陳基

何處林塘好，卜鄰清江繞屋淨。
無塵定巢新燕，渾如客泛渚。
輕鷗不避人，楊柳作花香。
勝雪鱸魚上釣，白於銀。春風無限滄浪意，欲向汀洲賦采蘋。

夜宴范氏莊

元 楊維禎

南弁山間多翠微，池塘處處涵清暉。
丹泉釀酒名千日，花樹成窠大十圍。
童子單衣碧鸛立，美人兩袖彩鸞飛。
臨分更作嬉春約，賸載紅船白苧衣。

次韻沈陶菴題有竹莊

明 張 淵

愛汝石田茅屋好，依然風物似斜川。
白蘋洲渚滄江外，紅樹園林夕照邊。
艇子打魚偏趁月，山童洗藥每臨泉。
老夫欲問東家住，分取瓜疇數畝煙。

暮春初過山莊

明

李先芳

山人本性愛山居，弭節春遊過草廬。
短砌雨餘芳草合，小亭風定落花初。
拂塵下榻驚梁燕，開篋抽書走壁魚。
更闢巖扉頻洒掃，能無長者命巾車。

五言絕句

春莊

唐

王勃

山中蘭葉徑城外，李桃園直知人事靜。
不覺鳥聲喧

題張處士山莊

唐

杜牧

好鳥疑敲磬風蟬認軋箏修篁與嘉樹偏倚半巖生

七言絕句

奉和聖製韋韞立山莊應制

唐李嶠

萬騎千官擁帝車八龍三馬訪仙家鳳凰原上窺青壁
鸚鵡杯中弄紫霞

奉和聖製韋韞立山莊應制

唐李乂

曲榭迴廊繞澗幽
飛泉噴水溢池流
祇應感發明王夢
遂得邀迎聖主遊

奉和聖製幸韋嗣立山莊應制

唐
蘇頲

樹色參差隱翠微
泉流百尺向空飛
傳聞此處投竿住
遂使茲辰扈蹕歸

奉和聖製幸韋嗣立山莊應制

唐
武平一

鳴鑾奕奕下重樓羽蓋逍遙向一丘漢日惟聞白衣寵
唐年更覩赤松遊

和裴令公南莊一絕

裴云野人不識中書令喚作陶家與謝家

唐白居易

陶廬僻陋那堪比謝墅幽微不足攀何似嵩峰三十六
長隨申甫作家山

題古澗盧拾遺莊

唐韋莊

主人西遊去不歸滿谿春雨長春薇怪來馬上詩情好

印破青山白鷺飛

石壁寺山房即事

宋 沈與求

望斷南岡遠水通
客檣來往酒旗風
畫橋依約垂楊外
映帶殘霞一抹紅

懷山莊子仁姪

宋 楊萬里

危亭獨上忽徬徨
欠箇山莊墮我傍
却是向來相聚日
老懷未解憶山莊

白莊道中

金 党懷英

暖風遲日弄春晴，
渾似龍眠畫裏行。
沙路半隨堤尾曲，
幾家桃李鶯鶯鳴。

題雞鳴山房

明
蔡羽

山浮寒碧水，
浮花石壁蒼蒼竹。
樹斜愛爾玉京秋色好，
白雲頭上看人家。

御定佩文齋詠物詩選卷一百二十一

欽定四庫全書薈要卷一萬八千七百四十四

集部

御定佩文齋詠物詩選卷一百二十二

園林類

五言古

夜遊北園

梁

簡文帝

星芒侵嶺樹月暈隱城樓暗花舒不覺明波動見流

遊韋黃門園

簡文帝

息車冠蓋里停轡仲長園檐疎遠興積賓至羽觴繁

從皇太子出元圃應令

梁庾肩吾

春光起麗譙
屣步陟山椒
閣影臨飛蓋
鷺鳴入洞簫
水還登故渚
樹長蔭前橋
綠荷生綺葉
丹藤上細苗
顧循慚振藻
何用擬瓊瑤

奉和初秋西園應教

北齊蕭慤

池亭三伏後
林館九秋前
清泠間泉石
散漫雜風煙
藻開千葉影
榴艷百枝然
約嶺停飛旆
凌波動畫船

南園

唐元稹

清露夏天曉名園野氣通
水禽遙泛雪池蓮迴披紅
幽林詎知暑環舟似不窮
頓灑塵喧意長嘯滿襟風

郡中西園

唐白居易

閒園多芳艸春夏香靡靡
深樹足佳禽旦暮鳴不已
院門閉松竹庭逕穿蘭芷
愛彼池上橋獨來聊徙倚
魚依藻長樂鷗見人暫起
有時舟隨風盡日蓮照水
誰知郡府內景物閒如此
始悟誼靜緣何嘗係遠邇

和裴侍中南園靜興見示

白居易

池館清且幽高懷亦如此有時簾動風盡日橋照水靜
將鶴爲伴閒與雲相似何必學留侯崎嶇覓松子

次韻答弒老獨遊東園

宋

黃庭堅

主人心安樂花竹有和氣時從物外賞自益酒中味
斷枯蟻改穴掃籜筍迸地萬籟寂中生乃見風雨至

曉出西園由谷中歸

元

甘復

被褐涉西園煩襟散清曉微風動高樹零露下芳沼始
行幽谷中忽出青林杪流水漂餘花修筠度啼鳥身緣

翠石回思逐白雲
杳負杖孤賞懷春
闌綠陰悄

七言古

邵郎中姑蘇園亭

宋梅堯臣

吟愛樂天池上篇
買池十畝皆種蓮
薄城萬竿竹嬋娟
藤纜繫橋青板船
折腰大菱不值錢
鵠鵲鵲沙際眠
水從太湖根底穿
月出洞庭山上圓
公歸與客相留連
秋風鶴唳春杜鵑
斑鱸斫鱠紅縷鮮
紫豉煮蓴香味全
我思白傳在三川
吳船雖有吳饌偏
當時九老各華顛

裴令來過吟復聯至今怪石存舊鐫七葉樹蔭黃金田
羨公有子勝昔賢高門通車千萬年

五言律

春日侍宴幸芙蓉園應制

唐李嶠

年光竹裏徧春色杏間遙煙氣籠青閣流文蕩畫橋飛
花隨蝶舞艷曲伴鶯嬌今日陪歡豫還疑陟紫霄

春日侍宴幸芙蓉園應制

唐李乂

水殿臨丹籞山樓繞翠微昔遊人託乘今幸帝垂衣澗

篠緣峰合巖花逗浦飛朝來江曲地無處不光輝

春日侍宴幸芙蓉園應制

唐
宋之問

芙蓉秦地沼盧橘漢家園谷轉斜盤徑川迴曲抱原風
來花自舞春入鳥能言侍宴瑤池夕歸途騎吹繁

崔禮部園亭

唐
張說

窈窕留清館虛徐步晚陰水連伊闕近樹接夏陽深柳
蔓憐垂拂藤梢愛上尋訝君軒蓋侶非復俗人心

春園即事

唐
王維

宿雨乘輕屐春寒著敝袍
開畦分白水間柳發紅桃
草際成棋局林端舉桔槔
還持鹿皮几日暮隱蓬蒿

題張野人園廬

唐
孟浩然

與君園廬並微尚頗亦同耕釣
方自逸壺觴趣不空門
無俗士駕人有上皇風
何必先賢傳唯稱龐德公

晚歸東園

唐
李頎

荆扉帶郊郭稼穡滿東菑
倚杖寒山暮鳴梭秋葉時
迴雲覆陰谷返景照霜梨
澹泊真吾事清風別自茲

陪鄭廣文遊何將軍山林

唐 杜甫

不識南塘路，今知第五橋。
名園依綠水，野竹上青霄。
谷口舊相得，濠梁同見招。
平生爲幽興，未惜馬蹄遙。

其二

百頃風潭上，千章夏木清。
卑枝低結子，接葉暗巢鶯。
鮮鯽銀絲脍，香芹碧澗羹。
翻疑舫樓底，晚飯越中行。

其三

風磴吹陰雪，雲門吼瀑泉。
酒醒思卧簟，衣冷欲裝綿。
野

老來看客河魚不取錢只疑淳朴處自有一山川

其四

牀上書連屋階前樹拂雲將軍不好武稚子總能文醒
酒微風入聽詩靜夜分絺衣挂蘿薜涼月白紛紛

重過何氏

杜甫

問訊東橋竹將軍有報書倒衣還命駕高枕乃吾廬花
妥鶯捎蝶谿喧獺趁魚重來休沐地真作野人居

其二

山雨樽仍在沙沉榻未移
犬迎曾宿客鴉護落巢兒
雲薄翠微寺天清皇子陂
向來幽興極步屨過東籬

其三

落日平臺上春風啜茗時
石欄斜點筆桐葉坐題詩
翡翠鳴衣桁蜻蜓立釣絲
自今幽興熟來往亦無期

其四

頗怪朝參懶應耽野趣長
雨拋金鑲甲苔卧綠沈槍
手自移蒲柳家纔足稻梁
看君用幽意白日到羲皇

寧王山池

唐
范 朝

水勢臨階轉峰形對路開
槎從天上得石是海邊來
瑞草分叢種祥花間色裁
舊傳詞賦客惟見有鄒枚

奉和元相公家園即事寄王相公

唐
韓 翃

共列中台貴能齊物外心
迴車青閣晚解帶碧茸深
寒水分畦入晴花度竹尋
題詩更相憶一字重千金

題鮮于映林園

唐
司空曙

雨後園林好幽行迴野通遠山芳草外流水落花中客
醉悠悠慣鶯啼處處同夕陽自望遠日暮杜陵東

題李沆林園

唐
盧綸

古巷牛羊出重門接柳陰間看入竹路自有向山心種
藥齊幽石耕田到遠林願同詞賦客得興謝家深
春日同諸公過兵部王尚書林園

唐
權德輿

休沐君相近時容曳履過花間留客久臺上見春多松

色明金艾鶯聲雜玉珂更逢新酒熟相與藉庭莎

題從叔沆園林

唐李端

阮宅閒園暮窓中見樹陰樵歌依遠草僧語過長林
鳥嘒花間曲人彈竹裏琴自嫌身未老已有住山心

題崔端公園林

李端

上士愛清暉開門向翠微抱琴看鶴去枕石待雲歸
暝坐苔生席高眠竹挂衣舊山東望遠惆悵暮花飛

春園即事

唐陳羽

水隔羣物外夜深風起頻霜中千樹橘月下五湖人聽
鶴忽忘寢見山如得鄰明年還到此共看洞庭春

題鄒處士隱居

唐許渾

桑柘滿江邨西齋接海門浪衝高岸響潮入小池渾巖
樹蔭碁局山花落酒樽相逢每留宿還似識王孫

初夏題段郎中修竹里南園
許渾

高人遊息處與此曲池連密樹纔春後深山在目前遠
峰初歇雨片石欲生煙數有僧來宿應緣靜好禪

園居

唐李郢

暮雨揚雄宅秋風向秀園
不聞砧杵動時看桔槔翻
釣下魚初食船移鴨暫喧
橘寒纔弄色須帶早霜繁

小園

唐李建勳

小園吾所好栽植忘勞形
晚果經秋赤寒蔬近社青
竹蘿荒引蔓土井淺生萍
更欲從人勸憑高置草亭

陳氏園林

唐鄭巢

當門三四峰高興幾人同
尋鶴新泉外留僧古木中
蟬

鳴槐葉雨魚散芰荷風多喜陪遊賞清吟繞石叢

程評事西園

唐僧法振

誰向春鶯道名園已共知檐前迴水影城上出花枝
搖拂煙雲動登臨翰墨隨相招能不厭山舍爲君移

開州園縱民遊樂

宋蔡襄

風日朝來好園林雨後清魚遊知水樂蝶戲見春晴
草軟速行跡花深隱笑聲觀民聊自適不用管絃迎

其二

節候近清明遊人已踏青
插花穿戟戶酤酒向旗亭
日迴林光潤風迴海氣腥
未知何處樂歸路已嚴扃

六月十日中伏玉峰園避暑值雨

宋文同

南園避中伏意適晚忘歸
牆外谷雲起檐前山雨飛
興餘思秉燭坐久欲添衣
爲愛東巖下泉聲通翠微

題丁少瞻林園

宋徐照

州分低嶺外來向此園行
路改初栽樹堂成未有名
藥

苗如草長巖溜入池清欲識懷君意時聞鶴一鳴

春日遊張提舉園池

宋徐璣

西野芳菲路春風正可尋山池依曲渚古渡入修林長
日多飛絮遊人愛綠陰晚來歌吹起惟覺畫堂深

後浦園廬

宋戴敏

卜築成佳致幽棲樂聖時何如謝公墅略似習家池地
暖梅開早天寒酒熟遲催租人去後續得夜來詩

題董侍郎山園

宋戴復古

行盡芙蓉徑尋秋叩竹關樓高納萬象木落見羣山平
野水雲際畫橋煙雨間紅塵城下路只隔一湖灣

家園

金周昂

五畝園連竹三間屋向陽氣和春浩蕩心靜日舒長花
鳥成相識琴書付兩忘陶然一樽酒誰復紀羲皇

過潘韞輝東園

明李幾

爲愛東園好春來事事宜藥名人不識花信蝶先知晉
帖臨青李商歌詠紫芝小車乘興往何必訂幽期

春日陪孟東洲憲使公重過宋氏園亭

明
馮惟訥

竹色青於染春生宋王家衆山當戶出一水抱城斜積
雨翻高柳輕寒勒早花風光正如此莫惜醉流霞

春園

明
謝榛

水邨人寂寂遲日敞柴關菜甲春初細園丁雨後閒沙
邊來白鳥柳外出青山此地多幽意行歌薄暮還

周氏園亭

明
俞允文

紫紺琳宮側芳園麗景回焚香青靄聚洗硯白雲開橘
想靈均什亭堪內史才更憐花逕裏月色夜深來

初夏園林即事

明 胡宗仁

夏入園林好欣逢霽景明藥闌香醉蝶柳岼綠迷鶯道
在心逾逸情閒跡自清夕陽紅欲盡一抹暮山橫

五言排律

同二相已下羣官樂遊園宴

唐 明 皇

撰日巖廊暇需雲宴樂初萬方朝玉帛千品會簪裾地

入南山近城分北斗餘池塘垂柳密原隰野花踈帘幕
看逾暗歌鐘聽自虛興闌歸騎轉還奏弼違書

恩賜樂遊園宴

唐張說

漢苑佳遊地軒庭近侍臣共持榮幸日來賞艷陽春饌
玉頒王筐撝金下帝鈞池臺草色徧宮觀柳條新花綬
光連榻朱顏暢飲醇聖朝多樂事天意每隨人

三月二十日詔宴樂遊園賦得風字

張說

樂遊形勝地表裏望郊宮北闕連天頂南山對掌中皇
恩貸芳月旬宴美成功魚戲芙蓉水鶯啼楊柳風春光
看欲暮天澤戀無窮長袖招斜日留光待曲終

題少府監李丞山池

唐李頎

能向府亭內置茲山與林他人驕驕馬而我薜蘿心雨
止禁門肅鶯啼宮柳深長廊閤軍器積水背城陰窓外
王孫草牀頭中散琴清風多仰慕吾亦爾知音

和李僕射西園

唐張籍

過午歸閒處西庭敞四檐高眠著琴枕散帙檢書籤印
在休通客山晴好捲簾竹涼蠅少到藤暗蝶爭潛晚鵲
頻驚喜疎蟬不許拈石苔生紫點欄藥吐紅尖虛坐詩
情遠幽探道侶兼所營當勝地雖儉復誰嫌

題崔駙馬園林

唐姚合

東園連宅起勝事與心期幽洞自生藥新篁迸入池密
林行不盡芳草坐難移石翠疑無質鶯歌似有詞莎臺
高出樹鮮壁淨題詩我獨多來此九衢人不知

寄題田待制廣州西園

宋 余靖

善政偏修舉，增完池館清。
地含春氣早，月映暮潮生。
石有羣星象，花多外國名。
與民同雉兔，邀客醉蓬瀛。
翰墨資吟興，雲泉適野情。
鎮應持左鰲，快欲鱸長鯨。
積霽藏樓閣，馴鷗識旆旌。
甘棠留美蔭，高倚越王城。

猗綠園

元 馬祖常

殖產吾何取，開林我獨能。
縛船常取竹，擣紙每移藤。
池曲波濤小，花繁霧雨蒸。
春雲同礎潤，秋月共江澄。
鳳下

非因食魚來不可冒寫經還道士裹飯乞行僧筍屨新
青折荷衣舊翠凝浮甌茶有乳溢甕酒無冰香爇留文
篆詩囊剩繚綾清晨餐玉罷東望日初升

七言律

題張逸人園林

唐韓翃

藏頭不復見時人愛此雲山奉養真露色點衣孤嶼曉
花枝妨帽小園春悶攜幼稚諸峰上閒濯鬚眉一水濱
興罷歸來還對酌茅檐挂著紫荷巾

題元注林園

唐李端

謝家門館似山林，碧石青苔滿樹陰。
乳鵲盼巢花巷靜，鳴鳩鼓翼竹園深。
桔槔轉水兼通藥，方丈留僧共聽琴。
獨有野人箕踞慣，過君始得一長吟。

遊東湖黃處士園林

唐劉威

偶向東湖更向東，數聲雞犬翠微中。
遙知楊柳是門處，似隔芙蓉無路通。
樵客出來山帶雨，漁舟過去水生風。
物情多與閒相稱，所恨求安計不同。

暮春康樂園

宋韓琦

榆莢紛紛擲亂錢
柳花相撲滾新綿
一年寂寞頻來地
三月芳菲已過天
樹密只喧閒鳥雀
臺高猶得好山川
老夫不飲時如此
徒有詩情益自然

上巳訪楊廷秀賞牡丹於御書扁榜之齋其東
園僅一畝爲街者九名曰三三徑意象絕新

宋周必大

楊監全勝賀監家
賜湖豈比賜書華
迴環自刷三三徑

頃刻常開七七花門外有田聊伏臘望中無處不煙霞
只慚下客非摩詰無畫無詩只漫誇

積芳圃

宋朱子

樂事從茲不易涯朱門還似野人家行看靚艷須攜酒
坐對清陰只煮茶曉起蒼涼承墜露晚來光景亂蒸霞
平生結習今餘幾試數毗那襪上花

再次秀野躬耕桑陌舊園之韻朱子

江臯晴日麗芳華翠竹踈踈映白沙路轉忽逢沽酒客

眼明惟見滿園花
望中景助詩人趣
物外春歸釋子家
向晚却尋芳草徑
夕陽流水遶村斜

次秀野韻

朱子

使君簾閣對修筠
起看名園雨後春
便賦新詩留野客
更傾芳酒酹花神
未酬管樂平生志
且作羲皇向上人
祇恐功名相迫逐
不容老子卧漳濱

其二

滿園紅紫已爭新
百轉幽禽亦喚人
蠟屐未妨泥步穩

珍叢終恨雨來頻
卧看曉色欣初霽
起約良游醉好春
却笑當年金谷宴
相隨僕僕望車塵

春日小園雜賦

宋陸游

市塵不到放翁家
繞麥穿桑野徑斜
夜雨長深三尺水
曉寒留得一分花
悶從鄰舍分春氣
閒就僧窓試露芽
自此年光應更好
日驅秧馬聽縑車

小園

陸游

窄窄柴門短短籬
山家隨分有園池
客因問字來攜酒

僧趲分題就賦詩晨露每看花蕾拆夕陽頻見樹陰移
拂衣司諫猶忙在此趣淵明却少知

山園

陸游

山泉引派漲清池野蔓移根種短籬藝果極知非老事
接花聊復效兒嬉提壺言語開顏聽啄木衣襦緩步窺
莫笑題詩還滿紙小園幽事要君知

初夏遊凌氏小園

陸游

水滿池塘葉滿枝曲廊危榭愜幽期風和海燕分泥處

日永吳蠶上簇時閒理阮咸尋舊譜細傾白墮賦新詩
從來夏淺勝春日兒女紛紛豈得知

新闢小園

陸游

新展山園半畝強笑人車馬出籠坊山禽乍暖慙懃語
野蕪無風自在香點點水紋迎細雨疎疎籬影界斜陽
出門遙向鄰翁說釋耒相從共一觴

陳侍御園上坐

宋范成大

倦眼逢歡春水明詩情得酒春雲生花梢蝴蝶作團去

竹裏鶉鴝相對鳴
邂逅浮生此日好
纏綿俗累何時輕
擘箋沫墨乏奇句
擲笛當筵慚妙聲

小園

宋戴敏

小園無事日徘徊
頻報家人送酒來
惜樹不磨修月斧
愛花須築避風臺
引些渠水添池滿
移箇柴門傍竹開
多謝有情雙白鷺
暫時飛去又飛回

西園得西字

金馮延登

芳徑層巒百鳥啼
芝蘭畹自成蹊
仙舟倒影涵魚藻

畫棟飄香落燕泥。淑景晴熏紅樹暖。好風輕泛碧叢低。
岡頭醉夢俄驚覺。歌吹誰家在竹西。

西園書事

明高啟

西園春去綠陰成。已覺南窓枕簟清。簾捲斜陽歸燕入。
池生芳艸亂蛙鳴。葉過穀雨花猶在。衣近梅天潤易生。
獨坐正知閒晝永。吟餘消盡篆煙輕。

次韻寄題鏡川先生後樂園

明李東陽

藥欄花圃背堂開。一日朝回幾度來。范老心終念廊廟。

寇公家不起樓臺海邊釣石鷗盟遠松下碁聲鶴夢回
多少舊題詩句在碧紗籠底認青苔

晚雨飲子重園亭

明
文徵明

高齋落日偶追從樽酒淹留一笑中芳草滿庭飛燕子
晚涼和雨滴梧桐江魚繞筯肥烹玉野樹藏春淺映紅
潦倒莫言歸更晚習家池館愛山公

春夕潘園

明
楊慎

雨砌風檐墮棟花蟲書鳥字徧晴沙春山載酒馳朝馬

江閣邀賓起暮鴉
陶令葛巾從滲漉
管寧紗帽任欹斜
殊方未覺追隨盡
韋曲風流更爾家

遊徐公子西園

明

蔡汝楠

西園飛蓋月中遊
隨意登攀自可留
門徑近連馳道樹
池塘遙接漢宮流
坐看虛牖明朱轡
行見深松間畫樓
一自王孫開別第
鳳臺花鳥不知秋

行後園新池

蔡汝楠

後園鑿沼愛漣漪
日日行園人不知
浴鳥參差雲宿處

戲魚來往芰搖時晚依巖岫分寒翠秋入芙蓉映倒枝
最是一泓清興足五湖情事寄臨池

張舜卿園亭

明
許陞

綠陰深巷寂無譁小結茅亭玩物華花散餘香來客座
竹分新翠過鄰家錦袍垂手閒調鶴烏帽籠頭自煮茶
況值承平常偃武不妨詩酒作生涯

五言絕句

春園

唐
王勃

山泉兩處晚花柳一園春還持千日醉共作百年人

南垞

唐王維

輕舟南垞去北垞祿難即隔浦望人家遙遙不相識

張郎中梅園作

唐孟浩然

綺席鋪蘭杜珠盤折芰荷故園留不住應是戀絃歌

絕句

唐杜甫

急雨捎谿足斜暉轉樹腰隔巢黃鳥並翻藻白魚跳

杉逕

宋朱子

南起雲關口縈紆上草堂天風發清籟山月度寒光

六言絕句

田園樂

唐
王維

采菱渡頭風急策杖林西日斜杏樹壇邊漁父桃花源
裏人家

其二

桃紅復含宿雨柳綠更帶朝煙花落家僮未掃鳥啼山
客猶眠

七言絕句

奉和聖製同玉真公主遊大哥山池題石壁

唐
張說

池如明鏡月華開
山學香爐雲氣來
神藻飛爲鵲鴿賦
仙聲颺出鳳凰臺

和沈太博小圃偶作

宋
趙抃

名園雨後百花繁
人倚危樓十二闌
園裏芳菲樓上客
一般情緒怕春寒

其二

日烘薄霧開柔陌
風冒遊絲著柳條
語燕啼鶯自撩亂
驚人殘夢是春朝

書湖陰先生壁

宋

王安石

茅簷長掃淨無苔
花木成畦手自栽
一水護田將綠繞
兩山排闥送青來

開園

宋

蘇軾

西園牡籥夜沈沈
尚有遊人卧柳陰
鶴睡覺來風露下

落花飛絮滿衣襟

南園

蘇軾

不種夭桃與綠楊，使君應欲候農桑。
春畦雨過羅紈膩，夏壠風來餅餌香。

過靈壁張氏園

宋曾鞏

秣地成來多釀酒，杏林熟後亦留錢。
不須置驛迎賓客，直到門前繫畫船。

春日偶作

宋朱子

聞道西園春色深，急穿芒屨去登臨。
千葩萬蕊爭紅紫，誰識乾坤造化心。

園中雜書

宋陸游

殘花委地筍掀泥，茗椀香囊到處攜。
幽夢欲成誰喚起，半窓斜日鷓鴣啼。

花時徧遊諸家園

陸游

翩翩馬上帽檐斜，盡日尋春不到家。
偏愛張園好風景，半天高柳卧谿花。

飲張功父園戲題扇上

陸游

寒食清明數日中西園春事又匆匆
梅花自避新桃李
不爲高樓一笛風

東園

宋僧道潛

曲渚回塘孰與期
杖藜終日自忘歸
隔林彷彿聞機杼
應有人家在翠微

遊何氏園

金馬定國

八尺龍蛇薜荔牆
瘦紅踈竹更蒼涼
梅花映水無人見

隔岸飛來片片香

邨園

元金涓

半畝邨園接水涯
誅茅新構小書齋
窓前不用栽花柳
只對青山景自佳

後園

明羅洪先

南邨雲雨北邨晴
晴鳩雨鳩更互鳴
東風吹雨衣不濕
我在桃花深處行

御定佩文齋詠物詩選卷一百二十二